

Lingalaks AS  
Grovbrotet 8  
5600 Norheimsund

09.04.2021  
Vår ref: O.J.Sagen

Vestland Fylkeskommune  
Postboks 7900  
5020 Bergen  
post@vkfk.no

### **Søknad om endring i anleggskonfigurasjon ved lokalitet Tveitnes (30717) i Kvam herad**

Lingalaks AS søker med dette om å flytte eksisterande anlegg ved lokalitet Tveitnes innanfor området som er avsett til akvakultur i kommuneplanen sin arealdel. Søknaden inneber ikkje kapasitetsauke.

#### ***Bakgrunn for søknaden – presentasjon av Lingalaks***

Lingalaks AS er eit familieeigd selskap som vart stifta og starta opp i Hardanger i 1978. I dag har selskapet 10,2 konsesjonar, og produserer laks på i alt 15 matfiskanlegg. Desse er fordelt i Hardangerfjorden, i Alver, Bømlo og Karmøy. Hovudkontoret til Lingalaks ligg i Norheimsund i Kvam herad, og selskapet bidreg med si drift til lokale arbeidsplassar i fleire kommunar med totalt 54 årsverk. Lingalaks sine kjerneverdier er å kvar dag arbeide *ærleg, kvalitetsbevisst og framtidsretta* – og såleis syte for gode laksemiddagar til forbrukarar i heile verda, og ikkje minst lokal sysselsetjing i ein berekraftig sjømatproduksjon. Lingalaks er ei godkjend lærebedrift i akvakulturfaget og har i dag 3 lærlingar i opplæring tilknytt Ytre Hardanger opplæring.

*Berekraft* står sentralt hos Lingalaks: Me er opptekne av å ha godt miljø i og rundt anlegga, og gode tilhøve for husdyra våre. Målsetjinga vår er null utslepp og ressursar på avvege, og me arbeider kontinuerleg for å finne innovative løysingar for næringa. I denne samanheng vert det jamnleg utarbeidd berekraftsrapport for firmaet, for å kunne målbevisst redusere fotavtrykket. Lingalaks deltek i miljøkartleggingsarbeid i Hardangerfjorden som Marin overvåking Hordaland og villfiskprosjektet Salmon tracking. Dette er og ein viktig del av Lingalaks sine kjerneverdier. Lingalaks er Global Gap-sertifisert og har oppnådd ASC-sertifisering. Dette er internasjonale standardar med høge krav til berekraft, dyrevelferd, miljøvern, kjemikaliebruk og arbeidstilhøve. Me nyttar kun nøter utan kopar i Lingalaks, og har som målsetjing å elektrifisere alle flåter. Desse to punkta er viktige i berekraftsperspektivet. I desse dagar er Stadionlaks med Lingalaks og FRAMO i spissen i ferd med å realisera eit lukka flytande produksjonsanlegg gjennom utviklingskonsesjonar tildelt i 2019. Oppstart drift er planlagt i 2023.

*Samfunnsansvar og berekraft* går hand i hand, og Lingalaks bidreg lokalt både innan helse, idrett og kultur. Årleg gjennomfører Lingalaks, med alle tilsette, plastrydding i

strandsona i samarbeid med kommunen. Arbeidet er svært nyttig i seg sjølv, men har og ei viktig haldningsskapande funksjon i bedrifta og i lokalmiljøet elles.

### **Behov for endring i anleggskonfigurasjon Tveitnes (30717)**

For å optimalisera drifta med omsyn til miljøtilhøve, ynskjer Lingalaks å flytte rammene til eksisterande anlegg på Tveitnes i sørvestleg retning (sjå vedlagt kart). Anleggsområdet vil verte utvida med 200 meter sidevegs og utover i fjorden, men vil framleis vere innanfor akvakulturområde som anlegget ligg i per i dag (innanfor vedteken kommuneplan). Flyttinga vil ikkje medføre kapasitetsauke på lokaliteten.

Lokaliteten Tveitnes er svært godt eigna for matproduksjon av laks, med gode straum, botn og -miljøtilhøve. I dag ligg anlegget over eit søkk som samlar utslepp, og på bakgrunn av dette ynskjer vi å flytte rammene sørvest til betre botntopografi. Vi legg opp til åtte ringar med god avstand mellom desse, slik at punktbelastninga blir lågare på lokaliteten. Dette vil også gi oss moglegheit til å sirkulere biomassen mellom generasjonane, slik at belastninga vil verte mindre.

Ei endring av anleggskonfigurasjon vil betre miljøtilhøva og optimalisere produksjonstilhøva på lokaliteten innanfor same produksjonsvolum som i dag. Driftsforma vil vere tilsvarende som i dag, med vårutsett og god brakkleggingsperiode. Fôringa vil skje med kameraovervåkning frå fôrsentralen vår i Norheimsund slik som er praksis i dag.

Vi arbeider i dag med å elektrifisere flåten på Tveitnes. Kobling til landstraum vil ferdigstillast så snart søknaden om endring i anleggskonfigurasjon på lokaliteten er ferdig handsama.

Me vonar på snarleg og positiv handsaming av søknaden vår.

Med venleg helsing  
Lingalaks AS

*Anita Stevnebø*

Anita Stevnebø  
biologisk koordinator